

UPA2026/112: Kalaallit Nunaanni mittarfinnut nunanut tamalaanut atorneqartunut tamanut kalaallit erfalasuata qaqqineqartarnissaa qulakkeerneqassasoq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

Akissuteqaat

(Naalakkersuisut Siulittaasuat)

Aappassaaneerneqarnera

Inatsisartut Inatsisinut Ataatsimiititaliaannut aalajangiiffigisassatut siunnersuummik aammalu Inuit Ataqtatigiinniit allannguutissatut siunnersuummik saqqummiunneqartumik peqqissaartumik suliarinnissimaneranut qujanaq.

Aalajangiiffigisassatut siunnersuummi ilaatigut siunertaavoq, Kalaallit Nunaata nunami namminerimi kinaassusaata erseqqissarneqarnissaa aammalu nunatta nunanit allaneersunut tikeraanut ersarinnerulersinnissaa. Siunertaq taanna siunnersuutip siullermeerneqarnerata nalaani annertuumik tapersorneqarpoq.

Inatsisinut Ataatsimiititaliap siunnersuutip atuuffissaa, aamma umiarsualiviit allallu nunanit tamalaanit tikiffigineqartartut aamma ilaaterlugit, annertusitippaa. Tamatuma saniatigut kalaallit ilisarnaataasa pisortat naalagaaffiullu sanaartugaataanni ersarissarneqarnissaannik sulissuteqaqqullugit Naalakkersuisut peqquneqarput.

Taamaalilluni allannguutissatut siunnersuutip akuerineqarnera nunami namminerimi kinaassusitta sulii ersarinnerulerneranik malitseqassaaq. Siunertaq taanna Naalakkersuisut tapersorsorpaat.

Taamatut oqaaseqarlutik Naalakkersuisut inassutigaat Inatsisinut Ataatsimiititaliap inassuteqaataa malinneqassasoq, taamaalilluni Inatsisinut Ataatsimiititaliap allannguutissatut siunnersuutaa akuerineqassalluni.